

國朝駢體正宗卷十一

南城

西湖岳忠武廟合祀流芳翊忠

查初揆

慨夫且免云亡已絕腹心之禮高鳥旣盡猶存羽翼之恩  
是以宮涅失刑左孺之諫九復司隸成獄鄭昌之書一通  
烈思電流義心焱發沈寃哭七廟之靈雪涕罷五都之市  
然則立睢陽之廟竝附霽雲懷成季之勛同祀韓厥先河  
後海於義爲昭杭州岳忠武廟在西湖棲霞嶺之麓廟西  
偏舊有流芳祠一祀齊安郡王趙公士儂蘄王韓公世忠  
中丞何公鑄大理卿周公三畏薛公仁輔大理寺丞李公

若璞何公彥猷布衣范公澄之太學生程公安圖尚書僕射史公浩凡人又翊忠祠一祀殿前司校施公全布衣劉公允升義士隗公順凡三人晷景寢遠靈宇就頽梁靡偃虹堂不越雉於是前臨海令金匱華君瑞潢過而愴焉諮於同志式是崇規丹雘飾雲欂偃蓋睽盼紀勳之觀扶掖祚德之祠奉二祠之粟主以合祀之禮也每嘆周宣再造不聞方召之誅靈武中興未恪李郭之賞獨至光堯乃乖前軌鶯花社稷牛角山河議和之使方歸立懂之心安託斯時也若盧獄啟鍾室謀成蓋莫不挽參政之鬚拭相公之帶乃有蘭臺執法玉牒抗疏彭越旣醢樂布慟哭文種已死范蠡變名或詭迹於黃冠或上書於太學甘心

章鉞畢志褐衣甚至豫讓橋下猶驚襄子之魂張湊囊中  
竟歸杲卿之髮嗚呼烈矣忠武廟中舊藏繼忠侯畫像宋  
高宗墨敕及王孫鄴侯所製銅爵並奉諸祠金陀編在尚  
傳家祭之祠內簡牌空已懾姦雄之氣崔帥留韓魏公遺  
笏亦其例也祠經始于嘉慶七年越二年甲子夏六月落  
成是爲記



西湖新建白蘇二公祠碑銘

查初揆

夫叔敖灌雩萁之野國喬正封洫之疆限民名田水利尚  
焉水均爲遂爰次河渠之書民功曰庸未墜察至之典崇  
德報功蕭脂斯在而况韋臯入蜀爲諸葛之後身

中丞與  
曰傅生

同申徽移楚圖楊震之畫像

太傅遺像中  
丞摹奉祠中

貞亮協心今古

何間杭郡山阜阻深原隰交午磽陁失治汚萊彌望今大  
中丞儀真阮公申畫多方則壤連軌循農祥之前規懷水  
庸於曩哲乃建白文公祠於西湖之濱德施於民祭法有  
焉先是按察使無錫秦公創蘇文忠公祠於孤山寒泉秋  
菊水仙同祠鉄板銅琶神絃競奏中丞乃卽祠之左別構  
三楹以奉白公粟主題曰白蘇二公祠薦浚儀之陸雲表



桐鄉之朱邑前召後杜如叶乎壘篋裴雨張晴無涉乎參  
昂其合祠也固其所也乃若校其出處之塗綜其遇合之  
迹異同畧判可得而言盤屋縣尉福昌生簿姚武功宰執  
之才乃任卑劇仇季智鄉里所舉辱在簿書迹其初階非  
猶風馬一也洎乎召拜拾遺入直史館陛下謾矣賴李絳  
以解顏起居可乎因魏公而帖職委蛇之間遭逢小異然  
而宮官言事見折於王涯何殊科舉獻言得罪於安石二  
也至如託志文史娛情歌酒風船水枕俯仰之懷彌超竹  
閣柏堂勾留之契獨喻出李沖於鄭州陔名僕射使張謂  
於汚水湖諡郎官三也文忠每謂平生出處與自傳畧同  
寤寐之言勿誼苔岑之跡相踐至其合祠之故尚不係乎

此也夫赤紫者地也黜達者才也束溼者勢也以長慶改元之後視哲宗聽政之年一則恩牛怨李漸開清流之嫌一則蜀黨洛朋已啟僞學之禁賞花之譖方深青苗之害滋盛乃欲輟作息之勞謀鍾洩之利不格於宰執之消沮亦罷於林蒸之况瘁卒之石函量水葑田卷雲父老不驚魚鰕無恙亦可見神著獨斷智珠在懷於難爲之時行得爲之事守土者可以勸矣若夫徹壅通堙先扞錢江之流增卑培薄首疏運河之水雖大歷有引湖之井武肅有撩湖之兵而舂鋪爲勞沮御易塞二公之任畎澮者視今日爲校急二公之亟偃豬者亦視後世爲更難論世知人君子躡焉孤山舊有四賢祠祀唐刺史李泌及二公而以宋

處士林逋爲耐茲獨不及李何歟則以郡守之責莫重於  
水旱而刑名次之溝洫之志莫重於隄防而井渫次之是  
以渠成樊惠溝號張網崇安有清獻之名海陵致文正之  
頌今孤山屹兩堤之間而旃蠻虔二公之祀有以也祠經  
始嘉慶九年二月越月而落成銘曰  
以水漑石猶可泐思以水漑民不可泐思



屠蘭渚丈昔遊圖序

查初揆

若夫吳帶曹衣寫九邊之行色燕南趙北生四坐之酒悲  
暮年動髀肉之嗟皓首有風雲之氣如昔遊圖所述者豈  
非魁傑之士哉蘭渚先生謝跡壯遊希蹤肥遁拳毛已老  
不忘識塗之心霜稜欲秋尚作摩空之想十步之外芳草  
未歇百年之內白髮何多擯故我於朝華攄舊懷於夕露  
縑素所託情何深也當其祛祛作健瑣瑣論姻客中送客  
縫絲布於他鄉山上有山作藁砧于萬里二姓合朱陳之  
好三星明秦嬴之間將謂瓦磚服勞祖鞬爲禮而乃韋潤  
州之女壻鸛雀生嫌劉丹陽之妻兄檳榔消食奮衣徑去  
貨舂何從絲挂山頭姑爲馬客湖移屋裏誰見夫容方將

補卜式之郎就呂範之吏而驅環又折破鏡不飛三輔  
塵易隕窮途之淚二陵風雨誰招少婦之魂百二關前  
白衣祖道五千里外碧葬來歸斯時也洪爐熾炭頑鐵  
能銷瘴海狂瀾孤蓬難越母論孫楚之傷心安仁之改服  
猶然見女未一彭殤而卽此卷局靡寧支離不泊雖有  
達者能不腰可減帶腸若涸湯也乎先生則短後衣輕  
遠游冠好發朝雍梁之墟展幹參井之野子午關險戊  
巳屯空削華岳於鳶肩綴黃河於衣帶驚飈起而哀笳  
鳴嚴霜零而木葉脫客饜冷炙酒思如潮馬齒殘芻秋  
聲如雨扶風豪士爭呼袁絲爲兄河朔健兒願識朱家  
之面然且罔貧野迴獨漉歌成幾至符號半人夔稱一  
足眼中有鐵背上生芒

其遇可謂嗇矣其志可謂韜矣今夫轉蓬爲車者脂牽之  
病也化荃爲茅者隨牒之機也先生以淳皞之懷禦輪蹏  
之瘁以苴布之幹信羸紉之遭旣作歸人還爲遷客移家  
於越隸籍錢唐指青山作謝家鑄黃金爲范蠡碁聲聆婦  
姑之巖花影滿郎君之谷弱齡之子已舉孝廉伏元度有  
言作父如此定何如也而乃年華易邁流水如斯暮景飛  
騰夕陽無限車較較以生角老我是鄉日冉冉以成秋故  
人何處記金臺之突兀作銅狄之摩挲男兒爲肉飛之仙  
此日有腹痛之感關河不殊臙臘幾易宜乎話飛狐而紮  
欲唱黃塵而雪涕者已夫中年以往覺哀樂之慨多戢影  
以還悔少壯之日短巢痕已掃鴻印難尋夷險殊塗今昔



異視有不恤底戾歎周行者非人情矣先生遺矢未三曲  
踊能百望婿鄉而韞結睠客路之蒼涼白狼河北元菟城  
南履綦痕銷鼓吹夢杳攬斯圖者雖謂沈約愍塗之志張  
載敘行之撰可也

錢唐龔氏譜序

查初揆

翼邑五正懷姓九宗氏族尚矣少皞五百歲鳳鳥適至叔  
向十一族羊舌僅存譜系尚矣有唐以降日失其序夷總  
麻之心爲道路之子志士而慝焉胡丈五峯仁親矢其好懷  
沈雜戒夫儆俗雖宗派孤狹而屬籍燦備爲家譜若干卷  
受而讀之嘆其比類之嚴結體之允蓋其先系屬龔姓繼  
蒙胡氏爰自餘暨徙於錢唐范蠡去越便號陶朱孫卿在  
趙乃稱荀子異姓爲後吾士已睽若欲尋落葉於故根訛  
同類於異畝則三徙之後孰指其枌榆五世之親已絕於  
袒免李世林屬絕本宗高隆之養於姑氏別生分類掇附  
滋疑或者謂守墳墓者四姓同爲一炁分南北者兩祖何

國朝馬贊皇 卷一  
嫌二鄭爲賈之子別爲孫氏隨季之後更有范文正不妨  
俯葛藟之孤花疏醴泉之別派而嚴莊互見魚鄭同稱冒  
張祿入秦之義有莒人滅郟之嫌抑又難矣丈乃續戎祖  
考踐履宗首謂冒姓有忘本之疑復姓昧繼絕之例恩義  
兼盡權衡爲難於是法王氏之兩宗爲真公之北祖斷自  
始遷自爲一族或仍胡姓或復龔姓綜以旁行詳於夾註  
題曰錢唐龔氏宗譜重本宗也至於青寧程馬有錫類之  
蕃螺贏螟蛉有式穀之好以視夫數典忘祖筮易得姓者  
又何如也次君元杲善讀父書兼成兄志排纂旣訖屬引  
其端夫爽鳩御龍必推得姓之始青牛白馬亦詔受氏之  
初古人非無稽之談後世多自誣之事閔子騫之華胄已



遙崔武子之子孫滋媿何增高價祇見單門此則麟角不  
矜鳳毛自有不必溯遠系於黃神滄分流於碧海僕頭銜  
未老肉譜能勝濟陰則辨宗著錄開元之源派爲詳絜矩  
前哲誣諉何辭三從九親良用愾嘆不匱之義頌詩而已

紅蕙山房倡和詩序

彭兆蓀

嘗聞劉彥和之言曰蘭爲國香服媚彌芬書亦國華玩澤  
方美豈非以根同富媪而肸鬻者悅魄事歸晏娛而娛文  
者揚徽蓋索胡繩之纏纏則都梁迷迭不能斂其芳也羅  
皇墳之贊贊則芝房菌宮不能掩其雅也若今袁子紅蕙  
山房其殆勤思兼兩矣乎初崑山健庵司冠開書局於洞  
庭東山戢香羣籍銷茶鴻藻厥有紅蕙藍菊其旁星霜代  
移葳茂無改於是洞庭鈕子匪石效疏麻之折作文無之  
贈而楓橋袁子壽階爲築塲而時焉憶夫承接茵憑薰染  
煙墨府羅羣玉室啓謨觴湘雨方歇朱顏酖些三萬鐵錦輝  
煥色色同百軸油拳流香香雜門疑通德作帶縈書地似

羽陵代芸走蠹或上公簪筆露眼旁窺或羣士哦松頽容  
流笑此紅蕙之前塵也至乃巖暄野淑波麗帆開辟石戶  
而下單椒入菡閭而就小築東皇載艷紅影搖雲有美移  
家狂香擁擢性殊橘化踰淮益良子有蘭心雜佩以贈草  
上君遷之號室同善人而居此紅蕙之受遣也精廬杳窅  
旋房便娟培以隱士泥清潤以仙人水綠珠點夕露金然  
曉光亭風汎馨佇月搜豔動則奪目靜則襲人丹榴窳窳  
黤此靡顏朱榮熙曜遜彼潛穎此紅蕙之振奇也雖然土  
夫木伯懷離芷而不芳辛楣葯房入嫫媿而增美在昔一  
茅三脊藉泰岱之金繩百莖孤根任孔林之玉策眷言珍  
卉例近文章然則人非天士曷稱靈華地乏書城難安香



種今袁子汲古得綆真想  
在襟讀百二十國之寶書  
禿千五百皮之毛穎丹函  
壓地綵裘熙天千年脈望  
竹素成園一片心香人花  
同氣侔色而珊瑚枝架赤  
鬪采而藜火搖青露稱研  
朱秋相吹息是又紅蕙之  
諧際而文字之緣深故也  
時則大雅鱗萃八風棣通  
齋閒塵橫夜寂栗暢一唱  
百和摠摠搏搏錦瑟湘波  
之韻瑤情左徒之篇各爲  
傳神不辭書葉而僕則因  
之有感焉以彼岩隱挺秀  
非不貞萋也而糞壤雜之  
落岑宗生非不荃寄也而  
艾蕭免之霜嚴影獨山空  
跡孤雖余情其信芳渺斯  
世其焉託豈有厠巨公冊  
府登通士墨莊薰沐儒林  
始終文囿紅絲潑瀋吐齊  
爭輝彤管飛花流丹角豔  
若此蕙者其出處豈偶然  
乎國香

國華載服載玩猗歟袁子斯之謂已爰繼叔夜懷香之賦  
代小草聲言卽仿揚雲篆刻之文爲羣公牝導

陳藹人詩序

彭兆蓀

自四聲肇始韻事方滋百緣叢生溺音騰沸要歸於暉麗  
萬有獨榮心靈停雲繞風不必號鐘濫脇也吹葉嚼蕊無  
取夔吼鵬爭也韓非云豔采辨說謂之綺麗揚子云綠衣  
三百色如之何知此者可以讀陳子藹人之詩矣藹人少  
席華胄壯飲香名息土人妓有媯族大擁書靈檀之几角  
藝長楸之街吐文萬牒莫非夜光淬鋒十年鬱成宵練固  
已極旭歷銳銀之志將以贊密清鳥奕之休而乃泔跋不  
前魚登屢困飛蓬作鬢青草爲袍言愁則金縷年年吐恨  
則春蠶寸寸不無勺灑有待經窵况以通悅風裁便嬛逸  
思爲洞簫作諡取腰鼓纏身鼎社環開甕精鱗萃花飛釧



動夢窄春寬得無一聲河滿輒喚奈何十里前溪偷歌阿  
子至若文簫靈匹匏爵芳緣善法堂開楞嚴眷集通絮語  
於華鬢天上証蘭因於耨達池頭瑤想瓊思流波不息金  
迷紙醉綺緒紛來間作慶詞半歸側體逮乎紡磚別鶴金  
屏擁愁以玩婦高柔作詠亡孫楚雖復金釵阿杜難解胷  
春繡祿舒祺祗增眉繭是又歌離弔夢望窮紂絕陰宮唾  
月推煙恨裂坤靈扇牒者矣於是摛風裁興效騷命篇根  
情苗言孚甲新意或金相玉式豔溢鎗豪或霜辛露酸聲  
逾脆竹此葢都尉鴛鴦之什展商曲清聲而非魏收峽蝶  
之儕掉蓮華輕薄也今春予聯襪金閨出觀瓊什拊髀雀  
躍勸付琬鐫藹人方且黎收以辭悞悞而謝謂翡翠蘭茗

之製慮薔薇芍藥之嘲幾將以歌詩高厚自繩引開卷王  
昌爲戒則豈不知宓妃美女誕詞也而三閭以忠稱浩水  
育魚麗語也而寧戚以行顯平子樸學數詠美人休奕直  
臣善言兒女賦朱幃者泉明乃高士作金樓者蕭繹實眇  
僧廣平梅花昌黎銀燭致堯骨鯁寄意香奩和凝俠腸託  
詞帷薄司馬之鉛華寶髻大范之濁酒殘鐙忠簡梨渦歐  
陽江柳歷稽前哲綺障如斯類皆真宰不存翩其反矣藻  
詞譎喻又何傷焉彼區晉溝猶矜於激偏解必謂屏間色於  
紅紫耀正采於朱藍作法秀之詞爲泥犁之警則是康成  
所謂曉一孔之人而彥和所謂東向而望不見西牆也譎  
言未終徊徨已失用排目論付彼手民馬腹何愁蛇珠在

握君如溫尉將金臺命名我愧徐陵爲玉臺作序



雅樂精義後序

彭兆蓀

嘗讀班志藝文凡樂六家百六十五篇師中趙定紀述其  
鏗鎗制氏竇公布陳其爪指樂書之獻頡頏聖經自古籍  
湮淪史志襲繆搗箠阮之事濫列乎儒家伶工技師之  
言錯附於經術識者興嘆於道悖矣逮攷鄭子敬氏書目  
謂儀注不得附禮編年不得附春秋後之樂書宜各爲類  
直齋陳氏遂援斯義凡諸琴說退置雜藝之前以姬孔之  
雅弄下儷巴渝昧牙曠之神解概同部伎是謂道藝不分  
古俗淆亂偏激之論寧復有當乎我外大父蔡能一先生  
元漢秉質恬敏宅心粹榮就枯削跡捐勢橐筆西邸間爲  
鄒枚之遊繫情北山力謝孝獻之辟獨以覃思研究琴旨

上探空積忽微之數下及樓挽操將之法因流沂源斥哇  
去鄭彙集成說葺爲全編總統古今辨析同異末附新奏  
所謂神而明之之事樂出於虛技進乎道宣揚中聲羽翼  
經義蓋非墨客之師傳等人之譜錄所可齊眊也伯仲兩  
舅嗣芬早世兆蓀生晚未瞻西州顧於騎竹之年獲聞折  
蓼之訓矣我母氏慧發髻齒智周徽章在野之馬窳中之  
牛離羣之羊登木之雉審其和繆鳴其廉隅得物符手得  
手符物稽心羊體獨精其傳春徑晝淑秋堂夜闌風暄拂  
巾月大當戶茗甲欲圻爐香方酣拄指鉤弦輒作數弄情  
愔平穆穆乎導和宣情悟靈感物信然哉嘗手是書顧而  
嘻曰此櫻驛之津梁雅歌之統會昔濟南弱女能傳父書

陳留才媛克上遺籍予賁斯志欽欽如何兆蓀敬而聽之  
弗敢忘諗風木銜恤燧穀愴懷悔恨蒙心失肄疇曩屬有  
女弟猶解鞞弦邃旨元文未授十一緬追絲桐養德之義  
深抱蓼莪罔極之哀遠慙陽元宅相之言近軫廣陵絕弦  
之感遺佚滋懼爰校錄而傳之補缺訂訛將以俟諸達者  
登六藝之畧卽無覲於蘭臺調五音之鈞或遠軼乎簫譜  
爾



張子白進士入都謁選送行詩序

彭兆蓀

嘉慶己未五月華亭張君子白以綠衣籍久赤牒符來將謁選人用邀除板弭楫吳下稱媿而前凡在撫塵不遠數郡莫不鱗集麇至張飲於虎阜山房爲之錄別禮也維時鶴蓋成陰魚游認隊麥風吹以衣舉梅雨浥而酒香效園雪散雪之詞賄大山小山之什驅煙使墨旃檀遜芬流珠吐霞松篁亦韻至乃車子雜坐簪姐當筵氣暖吹蘭眸清射戟花邀佛笑詩雜仙心樂哉斯游忘其別矣樂舞旣闕衆詞迭陳各吐心聲間爲目論約有數端蓋可得而言焉或謂莊揚墨晏家各殊科廉范嚴徐致難合轍以彼雅文辨慧逸思雕華不以之筮承明侍溫室潤色鴻業按理秘

文而乃促管以走風塵陳掾而領赤望能無昆岡玉賤鵲  
抵生愁枳棘風多鸞飄起怨也乎且夫錦不爲幘者才之  
限戈不舂黍者器之殊今之令長古異清流上仰宣明之  
面則腰笏趨之下迎陽橋之魚則扱綸吸之山民樸而市  
民玩絲慮其勞一清望而二清才射懸其鶴君以風逸煙  
高之致讀司空城旦之書未免埃壒嫌煩神鋒慮峻蕭育  
是杜陵男子何肯詣曹裴秀實儒林丈人不習爲吏但使  
哦松署牘拄笏看山庭延風月政倦戴星詞吐虹霓訟難  
掃電此則弦歌雖奏轉來謠詠之聲桁楊不施無當亭疑  
之法是又官方所排迨而執友所憚餘也凡此衡言要皆  
調語侷色揣稱蒙竊惑之夫目上耳下哲士之鑒澄穀圓

軫方通人之用大子白元慮速捷中獻外明古懷抗雲書  
眼若月無三疊五交之失有博分致衆之心不駒錄以檢  
身竊比和者好粉偶跡弛以諧世非同意政曰糠今者低  
頭人中依方銓引試當官官辦作夏雨雨人何羨乎清華  
何嫌乎凡悴是故於其測交也信其獲上於其鑒古也信  
其燭機於其壺士也信其活人於其悅情也信其和庶天  
豈能解必不閃掄以苟全金心在中必不愉縱以尸職佳  
乎吏也侯其禱而蒙則更有進焉者非於策名之日先爲  
招隱之詞實以投分之深常有停雲之戀苟當徽明未耗  
譽業方籍最報吳公祠留石相遂乃絳霄在望黃鵠高飛  
理東山之舊懷踵南嶺之逸志一行鷗侶寤後之往夢重



尋七里鶯花春餘之墜歡再拾豈非落落焉其有風颺者  
哉我之懷矣異乎人斯借曰贈言如是而已若夫瓊慧者  
圖其淺利韞蠶者貌爲篤誠計階級之崇卑量壤土之肥  
瘠謁府則頭搶據案則心盲禪蝨自跳網蛛坐結必沾沾  
焉反以杜畿爲疏誕斥王衍爲清談是自處於桎梏疏屬  
而笑夫帝之懸解也衆客聞之盱衡而笑三爵旣盡四聲  
遂歌卽用荒言以爲前馬計送行詩若干首詮次於左

答李洪九進士書

彭兆蓀

某再拜辱來書教以專力時文先務進取博雅好古勿以  
間之是何愛我之深而知我之淺也三復循省不知所裁  
請貢迂言申其愚素惟足下圖之側聞正文字者惟學林  
通古今者曰選士義歸一轍道匪兩歧在漢諸生試家法  
練虛實於端門光祿舉茂才辨異能於公府皆以廣延鴻  
達非俾妄生羽毛是故奏書家令不聞衣鉢之傳上第江  
都別乏揣摩之術以今况昔時異勢殊然明試求賢心同  
籲俊有司發策志在魁能惟偶體之時文乃一王之定制  
苟其揆源星海搜祗珠林體選舉之本懷奮經生之絕業  
則將伐山刊木登本捐枝採擷春華鬱爲秋實幸而珠能

照乘璞不返荆雖此時文特爲羔鴈眷言小技無妨弁髦  
然根茂則實昌膏加則光遠卽或潤色鴻業別使斧藻隆  
平上無愧得人下無忝稽古此爲上策抑有命焉不則鏗  
采埋光韜精隱曜玉在匱而無色金委沙而不祥亦將砥  
業名山寄身汗簡食盡神仙之字脈望千秋游思竹素之  
園乾螢不老此爲中策窮士以之凡此二端要由底蘊植  
基不厚則進退惟谷培根旣固則隱顯皆榮非迂誕之浮  
詞實報施之不爽也若夫弋獲希心好官錮志操僞法以  
求仙錄奉豚蹄而祝篝車鷄毛三寸免園一冊黃花誤讀  
孤竹不知問太傅之爲誰辨孟堅之非固我將愧而入地  
彼猶懵然坐雲是卽秋賦濫登春闈竊吹魚目可混瓦釜



易鳴飾金章於走肉被朱紫於行尸生同羣項之烏歿作  
一邱之貉古今袞袞不乏其儕得尚非榮失而何冀此爲  
下策無用三思足下憫我頽雲慮其鍛羽以讀書爲迂軫  
開捷徑於終南舍南面之百城屏油素之四尺欲以一卷  
龍骸作我三冬課程是使駿愁道遠旁求縮地之方鳳苦  
天高降學搶榆之勢航斷港而求通塞天河而丐潤見愛  
則切爲謀已疏又何慎也不寧惟是夫來書戒以驚博則  
視僕爲汲古之人勉以制科則視僕爲忘名之輩揆之下  
走均有未符某束髮從師挽鬚承訓裹白袍而踏省燒樺  
燭而呈藝僂得僂失十稔於茲初未嘗仰屋著書鑿坏遁  
跡侈葩華之萍流薄帖括而不事也乃足下遽以爲奇駭

而陳戒良由三堆塞僻巾字峰寒士習麻沙戶安彫劫覆  
元文於醬詭驚南華爲僻書見有物識漢唐間嫺醉賦遂  
乃魚愕雞睨鶚視鷹隣居嫫母之邨庸姿妖麗入豚牢之  
廐凡馬空羣究之如某下材何足僕指是又足下之過慮  
也且也十擲輒捷非關博拙一呼成雉豈曰人功苟學海  
之旣探卽命宮之是繫足下義心清尚好學深思茲之出  
手得盧亦是投壺中雋本非襲取別有旁門而諄諄以此  
相規者得毋金門旣入遂謂秘籥能探幸登衆迷之津謬  
詔獨醒之筏則是寄奴得采屬劉毅以呼臬李蔡封侯勸  
北平之學射用情良厚其如舛何夫天幸數奇命途不一  
盛名厚實彼此難兼祗當力稽求豐不必披榛覓路三千

里外言盡於斯至如聖賢立心豪傑自命以科舉爲一厄  
甘墨水之三升昌黎應科目之書紫陽戒門人之語前型  
具在不復更論足下聞之益當河漢子寧以他規我竊自  
比於鄭僑也



與吳韻學書

彭兆蓀

一昨伏奉手畢垂示和章樽遽裂月接宏響於夔牙噴露  
吹霜挽頽瀾於翰藻以咸池酬北里舉樸椒厠翹薪此真  
慧命所云溢目致歡而撫膺多愧也心路咫尺事阻山河  
浮雲色曉悵然魂越足下醴粹秉質貞亮挺姿通經爲高  
密之兒問絹走胡威之傳致能騷牢金石檄掖風雲變醜  
養瘠氣往轅古剡刃反僞鏡能照神大雅之材茂矣美矣  
竊念斯道久雜榛莽原其大端厥有五弊鄉曲猥子章句  
鄙儒手未窮滔繩目未營邱索終朝點綴不過人間小書  
分夜呻吟乃類筐篋瑣語謬冀妙悟可棄筌蹄直謂別腸  
無關故實是謂庖厨不修欲延大賓山木弗度徒詔良匠

其弊一也任力耕耨縱心丹鉛驚博適以溺心矜文遂致滅質徵名有同於黠鬼比事或等於補衲縛采繁辭貽譏疥駱翠綸桂餌轉笑失魚是曰詭癡終慙妍手其弊二也汎均堂者怯浮海之航捨枋榆者昧垂天之翼局趣轅下取媚一時粉黛飾壯士之容譎譎學兒女之語畧涉宮體嗤曹劉爲古拙習爲俳俗視齊梁作後塵自棄高聽無涉交流其弊三也祖述曩哲尸祝前徽語必黃初書刪唐後凡屬賦別卽云携手河梁思工發端必曰大江日夜百年萬里落日西風見哂藝林比之優孟襲貌遺神其弊四也文章遇物成象各有體裁春日不必學歸藏江水不能同大傳崩豁雷碾之句非所施於山林宏岬蕭瑟之音難以

登諸韶濩核量文質貴集衆長必据僧清而薄韓豪斥謝  
巧而慕裴質執一隅之解忘萬端之變其弊五也五者沿  
流更生三惑無邁古之志抱獵名之心濶扁一函希榮田  
竇之里油素四尺獻業金張之門諛言入則色飛毀辭來  
則氣涌圖分朋甲互相詆謨魂魄一去同歸秋草此一惑  
也義絕規諷感乏心靈題圖與讌之作累牘連篇介眉悼  
逝之言抗塵走俗四聲豈編紵之具六義非巫祝之倫返  
之寸衷了無所涉去道益遠雖多奚爲此二惑也品貴自  
立詩歌亦然隆赫譽望不皆振奇之賢沈落光耀非無英  
絕之士乃有魚貫鳧躍附翼攀鱗誤習辟支之禪遂致橫  
流之酷此三惑也今欲掃五弊之叢滋祛三惑之積俗爲



百川障扶九服輪舍執事外誰可語此哉歷下亭古濟南  
士多子舍納宜履候無爽他日振策覓繹停轡鵝城得復  
擊銅鉢圍籠爐白雪樓高錦湖秋麗南音繼作當互唱乎  
黃麈東閣許窺諒弗施平行馬心乎愛矣青鳥明之

天池記

彭兆蓀

出寧武城而西四十里古寧化軍所屬地碎石犖确岡巒  
崦靄山原之上有池齋濛方廣百頃皎焉冲照旁注汾水  
下承桑乾東連元池津脈潛引灤涇之辨見於道元之書  
祁連之名傳於佛助之史淳泓澂澈微奇効靈歷有年所  
以逮李唐資其水草置牧設監車騎所集流杯以嬉蓋亦  
旋鴻神泉之亞也閱千餘齡電迅焱逝原隰遼迴素波獨  
激邊風淒厲起於厓谷韡文鱗獵淪漪竟川秋花數叢雜  
無名目傍渚照影流媚送馨厥性潔濁不受斥草時有翠  
鳥銜污其中激素飛清尤足異已巖棲谷汲山夫蕘豎習  
焉相忘過而不曉邑尠辭人兼乏好事頌斌之樂帶霓之

勝槩爾闕如予以嚴辰肅月命儔嘯侶嬖珊池上天鏡落  
目心波湛然長空卷雲俯仰一碧太清不滓喜無行舟鳧  
雁有聲足代漁唱簡文帝云禽獸魚鳥自來親人王司州  
云人情開滌日月清朗斯池有焉夫影娥太液混瀆於禁  
籞高陽昭華森漫於坳野皆以勝遊騰人口頰斯池地鄰  
阨塞人稀獸繁緬道武稅駕之所余朱聞樂之年今昔代  
更喧寂亦異顧不以寥聞改其淵涵陽焯不耗陰霖不溢  
是非含真蘊素有符潛德者乎瘦日將匿玻黎漾霞倒載  
接羅彌望廣瀛濡毫記之可俛然感矣



泛潁記

彭兆蓀

乾隆壬子之歲予客汝陰已闋三稔地當潁尾水波徵復  
上流直清下流曲漪和仲所嘆近在眉睫坐窗不邀悔且  
次骨乃以伏日傳箋召朋蕉衣葛履出自北郭艇齋五尺  
隔水招手蔭翦一席當垞展風兩髯不言背立鳴榔緩搖  
波開燕尾細翦火雲彤彤覆頭半陰清風習習兩腋徐舉  
白鷺前起沒於蒼煙紅藕作花近在舵尾岸柳什百或垂  
或斜時有微颺送之蘸水汀曲叢草香來不名渚間鳴蛙  
聲出無跡科頭倚窗俯視綠淨照見髮影誤驚游魚半川  
以上純爲黛色及至前浦乃皆松陰原滌澈迴西湖在目  
錢唐羅浮名足相埒老葑十頃蒼龍卷空荒祠三間殘廡

沒水淪漣半規環若鏡匳別出一泓又似初月爰止樂牙  
衡流方羊穿菱拂蘆聽其所汎狂朋圍坐諧笑狎恰酒氣  
溫磨溢於蘋藻雁鶩啜噉旁窺尊罍伊誰烏鳥葦間微吟  
忽聆悠揚舵樓一笛菁雲於日旣成嘉遊柳瘦藤輪或發  
遐想撫茲古郡壤聯州來翠被出狩楚王侈功白亭拒吳  
慎人勞役於鏖霸業咸歸劫輪不隨世移祇有烟露豈况  
名哲晏呂歐蘇星堂柳亭鬱爲蔓草清景一失不如漁夫  
勝集匪常感我羈士借水洗貌摭文誌遊樂而不書抑惑  
也時與予同泛者山長華亭進士張若采郡人明經甯崇  
禮問禮劉澤菁任鯤化秀才元炳劉舍任之琦郝溶凡十

寧化定河村臺貽廟碑

彭兆蓀

伊昔天流洪洞炮媧奏績於蘆灰地判潢洋白阜資功於  
齋木疏宜豐物元圭錫石紐之聖隨刊佐治阜旂啓嶠函  
之封類以神靈力碑奠又是故梅梁啓殿犧尊肅其明裡  
玉女妻姚鵠首隆其胖蠻凡以申灌獻迓靈祇崇德報功  
昭融於赫也况乎金天衍裔勤勲於庚辰同木之先黑帝  
分符効績於元律蒼牙之後者乎惟神業世元冥官承顛  
頃五行以水爲本實主其靈長太原於晉爲都肇建其封  
域粵稽汾水發源武州由濛流而成巨浸逕狼孟而注大  
鹵南入河東之界別有洮水之亭厥惟二川轉汎三晉羊  
腸石白之險神奠其奔湍華谷黍葭之腴神宣其利澤凡



武靈之所聞琴賈辛之所射雉周王流彘之邑襄子拜神之區寶鼎獲而甘泉作宮白兔儻而竹書紀市綿周歷漢有幹有年咸仰神功俾成樂利所以重該修熙紹其統位躋乎靈威赤標之班沈妣蓐黃薦其馨祀同乎夷鼓青陽之胄國僑崇疾配之以參星酈元注經系之於涑水唐宋以下享祀勿或奏橫汾之簫鼓足代神弦瀉碧玉之清泠堪當明酌叔虞舊壤妥侑古矣茲寧化定河村者左接汾堧右鄰谷口北山經曰管涔之山汾水出焉此地當山之趾控汾之源舊有叢祠翳神是祀李唐垂令狐之碑文石晉著昌寧之封號春秋報賽暘雨應時勤事禦災實符祭法而說者謂神之宣障不在此邦黍稷匪馨義同附會不

知撫冕笏而念禹績不必定至塗山過唐魏而憶堯風詎  
在專歸蒲坂此境旣屬上游卽當來格猶之岨峽濫觴之  
江式禋奇相析木歸墟之海載祀陽侯豈同夫泗水之祝  
支祈巫夔之祠瑤女白龍綰綬李冰惟蜀郡稱神屬最分  
流巨靈獨華山効異也哉用新甓甃特薦牲牢盤雕之雲  
下垂疑飄芝蓋旋鴻之池遙注取潔椒漿帝首五官以命  
正派分形魚昌僕之儔水利萬物而不爭功超大翳虞余  
而上銘曰

參星之區有神司寒少昊之裔高陽之官大宣汾洮疏川  
砥澗并州之祠松柏九九惟茲僻壤近鄰管州實當汾源  
萬禩安流鬪無穀洛產有琳璆於彼於此莫匪神庥神之

來兮風馬雲車神之逝兮雅雅魚魚圖經有徵豈曰子虛  
如謂不然觀左氏書



明故特進光祿大夫柱國太子太保鎮守山西提督  
雁門等關總兵官左都督周忠武公夫人劉氏廟碑

彭兆蓀

星環斗極天孫聯上將之垣兵洗蚩尤元女授軒皇之策  
小戎知義女子嫺軍厥風古矣若乃馮嫫持節於昆彌呂  
母稱艾於海曲虞潭之妣撤佩珥以餉師張茂之妻率部  
曲而討亂荀灌嬰突圍取救潘將軍同幕從戎或先命婦  
以建旌或合侍姬而教射是皆軍圍壯女城號夫人膺崇  
義之封加貞列之號鬚眉巾幗前史美焉然未有際海水  
羣飛之日佐一柱以擎天當礮雲山壞之時蹈六丁而入  
地家赴紅羊之劫娘子軍燔力窮蒼兕之呼美人虹起如

故明周忠武公夫人劉氏之奇烈者也夫人系分龍豢作  
配虎臣冰霜瑩其蘭心翟莠莊其祿飾余朱發射盤雕不  
飛雍容率裙金鞍慣控久已取韜鈴爲膏沐易釵鐻以兜  
牟矣當忠武公之移鎮三關也地接飛狐峰鄰落雁公以  
麟振龍驤之國帥屬當烏頭馬角之窮邊朝廷以道濟爲  
長城羣醜指教曹爲地虎夫人撒環練士絝甲同仇挑刀  
走戟都兒亦使受兵容衷蠻韡扈養皆能成隊儻使蒼鵝  
勿出青犢無驚六羸風閉九邊塵息閩外則歌騰大角閩  
中則侯號雌亭房敖和鼙鼓之聲兒女吐風雲之氣豈非  
獨張錦繖平分譙國麾幢對樹牙旂復見平陽幕府者乎  
無何玉弩芒生金甌國破雁門司馬失律於輿尸晉陽中

丞致身於握節遂乃焦梨齧索喫狗磨牙合黑山張燕之  
羣犯白棒王熙之衆蓋李自成旣陷全陝進圍代州時則  
懷宗十七年二月也忠武公雪涕登壇投醪誓衆始拒忻  
代繼守樓煩發碇礮之礮蟻子頭飛開鞬轡之九駢鄰膽  
落九拒九攻六矢不動十盪十決一軍皆驚固將妖走羅  
平樓傳焦度而運當元二難揮返日之戈星燦旄頭望斷  
洗兵之雨兩甄鼓死百雉城頽公猶搏人以投張拳而戰  
達奚手皆見骨常山齒欲穿齧萬鏃晨飛大星夜落爰以  
二月辛巳罵賊而亡事具史宥忠傳婦孺固可得而詳焉  
於時夫人孤不怯兵危不撓勇健兒雖盡尚有蒼頭竈婢  
知兵非無紅線驅蠶母齋娘以拒敵合魚須臾獲以當關



賊燄千屯牙門一角夫人身凭鴟尾手挽烏號戟圍闔而  
突騎不前星鏑驟而櫓槍四散地鳴鼓角舞樓上之梯衝  
宮似修羅下空中之刀雨般戰血於鈴閣結蜃氛於虎衙  
月羽弦開肉飛仙倒蓋其繼公而與賊伉也如長離去而  
宛虹來耀靈淪而望舒睇一息猶在百戰何辭扞衛侯遮  
雙煙一氣竄哉尚已迨乎董澤之蒲莫繼綠林之刃交攻  
乃退守危樓積薪自焚閣門不辱婢僕偕亡嗚呼痛哉絳  
雲飛而玉碎赤燦怒而香消追忠魂於風馬雲車完勁操  
於炎煙烈電此則魄成精衛將憑朱鳥歌招火及天元足  
令須彌山動者矣會當改玉未及褒崇雖亳社之殉共悼  
乎伯姬而石窳之旌不聞於齊女茲者治隆築晏典舉明

禮乃脩廟食之儀用媿表忠之觀既耐公廟復設專祠嚴  
幃闔幄楹桷聿新桂醑椒漿春秋匪懈某備官斯土敬仰  
明威倣度尚之文當巫咸之祝爰鑄文字樹以穹碑蓋將  
銘勒金石質之乾坤禮也黃絹有慙丹誠可鑒庶幾叢鈴  
碎佩靈風滿聖女之旗萬禩千春石馬壯桃花之色銘曰  
時值鴟張運艱龍漢百萬封狼孤軍鵝鸛牙梟不鳴紙鳶  
信斷引決全家致身一旦巍巍官廨屹如九關婉婉紅顏  
嚴於泰山賊馬縮蝟賊面著癩力盡一炬隨公九天昔聞  
睢陽有陸氏姑又聞梁國江中援桴是皆知兵壯士無殊  
烈烈霜心方斯茂如載展祠宇載薦溪毛女隊夾侍綸巾  
繡袍塞月如鏡塞草如刀靈兮來歆視此石高

寧武周忠  
武公廟與

夫人合祀碑題歌詠甚夥而夫人貞烈專祠獨  
闕焉太守盛公因屬予爲文以補之兆蒸自記



滕城隍神驅貓鬼文

彭兆蓀

年月日具官某謹以清酌庶羞昭告於城隍之神曰昔者  
魚脯鯢殺齊君立五吏之祭樂車寓馬漢后啟三垓之壇  
長陵宛若亦奉神君雲陽船鄴尤崇巫祝迎年畫法前典  
攸存遠觀右賢左戚之朝虎武龍文之治天鏡照而黎邱  
滅跡乾暉煜而靈場失威六席六綵郊社無愆諸逐諸嚴  
牲牢悉罷苟有慶忌於螭之孽倍阿鮭蠶之媯嚇覲喉巫  
臂輦燭餅必將驅甲作命單佞棒用拾楮物窮五酉行鑿  
齒疇華之殛落白蜺嬰蕪之仙未有噪陽罔象忝竊瓊茅  
澤豕山魚質儀金累者也茲邦地匝岑崑風成壑果桓葱  
莊胥頗擅五兵楚鬼越機無聞比屋惟有貓鬼之祀實類

豬都之妖獨孤陀奉而稱神徐阿尼憑而爲厲流傳弊俗  
漸染巫風像倣煙蘿沈水薰而鬢似飾叨芝蓋羽葆合而  
華敷敦脈血拇曠眈蒙俱之面女丁婦王眇睞冶夷之容  
子夜寂而蘭膏明丙符焚而荆幡動遂乃挾邪作蠱鬼笑  
靈譚不枕戶樛遽遭蹙首直排櫺闔有類儀身羅帷卷舒  
人醉摩那陀果楚雲誕幻春酣毗瑟筴天浹席蜚生流庭  
蔡走似丹朱之憑房后甚公嫗之娶唐山幾使戶飲淫泉  
家芟貞樹女媧七十二化有此閃屍洛陽千五百神無其  
妖露際此金科照律玉燭含光凡夫東陵聖母石印郎君  
駱曜緬匿之法黃公粵祝之儔罔不匝宇潛蹤綿區戢影  
由庚載作左道咸誅豈茲小鬼之神乃假巨人之跡某職

當守土氣涌如山感悅驚龍久清陰訟妖雲悖雨詎追王  
 章業已盡械婆羅窮搜輦鐸率弩父亭公之衆奮桃更焚  
 索之威祝融一怒繪畫飛煙金布三申米師褫魄猶恐沈  
 履竈髻陽律難施騰簡強梁冥誅攸賴用修蘋藻冀降明  
 靈伏望彈壓氛祲劃開聲勢爲付留惡覷爲長房厲訶淬  
 刃於度朔之山傳札於葛陂之老務俾却驢山鼠悉就殲  
 夷天狗羶羊同歸柳維庶幾眷言婉變救月弓彎銀其姦  
 猖獲雄兆協鄉社絕八通之道閭閻開六慎之門畏子不  
 奔分奠下民之疵癘助我張目不求神聽之和平寧武俗崇於貓  
鬼巫者緣以爲利先君子宰是邑械衆巫至按畫像盡枯  
之出示嚴禁風遂絕此告神文蓋命兆蓀擬作初稟也兆  
蓀自  
記



寧徵君誄 并序

彭兆蓀

維嘉慶五年月日故徵君吾友寧君止齋以疾終於汝陰里舍君居江北我居江南聞信誠悼爲位而哭嗚呼痛哉君諱問禮字景陽一字止齋潁州阜陽人也陶正之系蟬媿乎有能薄閱之華冠冕乎頽尾貧也非病家有賜書正而不它代傳長德君生卽愴定幼稱茂良人貌而天役德勵冠雲之操視歲若月修業無息版之時少失乾蔭奉母而居與兄崇禮明禮皆以郡明經爲時模楷何家三隱尤數小山賈氏一門首推偉節有讓瘦推肥之誼無緩儒弟墨之嫌煦煦乎莊莊乎出爲人師入奉子舍酌生徒問奇之酒以壽肩梨分博士賜餐之錢以辨甘滑太夫人顧而

樂之雖三釜之悅口六珈之彰身無以過也性鄙浮薄不  
濫約歡苟有投分必罄衿袍得何遠矣語足賄一縑爲元  
伯結言不遠千里測交敦行義盡此矣生平研閱所及不  
下萬籤咫聞弗尚必稽仲尼之心蹶泮可羞博窺容氏之  
掌發爲翰藻動符經術削柿以寫閔意入於大爐據梧而  
吟精思應於鳴鏑雖復中年考校逐隊充賦所性不存守  
學彌篤會

詔徵孝廉方正之士今河督王公時爲郡將熟聞義聲獨  
以君名上於大府桓範下士驅傳而舉幼安郭祚進賢列  
表而推高緯人謂披泥抽玉沈川掇珠將命封軺之駕入  
承明之廬矣君乃晦不圖榮道不偶物遠慕漆雕未信之

語并無田生致親之懷公府三辭弓旌虛賁幾將如劉訐  
挂檄而逃學夏統拘嫌以養豈非赤石不奪節士之必國  
爵屏貴家人忘貧者歟彼懷軸覓舉掃門求知買聲濶扁  
之書希榮黃素之冊者伊何人哉伊何人哉予以弱冠客  
遊茲邦獲奉茵憑遂聯僑札焦陂雨霽西湖水澄雪且風  
朝暄辰肅月步履相逐榘酒互賡賞一卉之豔則聯情發  
藻晰半簡之義則騁詞飛辨執古之醇聽勗我以葆真離  
世之垢濁引我以元曠古之人所謂組織仁義琢磨道德  
形應影隨如蘭如芷者斯之謂已飄蓬轉風遂成離索書  
牘問訊七稔無聞不謂一旦冥焉長逝嗚呼痛哉後事之  
託有愧於鍾君潁川之碑何裨於陳實要惟哀情不能已



已乃作誄曰

四海朋交誰心誰面充路儒冠誰真誰廣弟靡波流經離  
道畔障瀾而東以一砥萬惟君貞德卒然清皓素帷不開  
黃經自抱伯墳仲篋蜚聲拔藻有母聖善怡顏忘老愉愉  
內行肅肅文林其風肆好明月在襟壓架萬帙挂壁一琴  
操翰落紙鏘然古音潛德自曜幽光不埋召南行義聞於  
泐淮鶴書下蒞元纁載來聿爲辟首登諸蘭臺君曰否否  
是豈余慕遺榮盡倫安我緇素赤緊難爲蒼生恐悞非敢  
鳴高煙霞疾痼惟君之志介石比堅知白守黑披莊草元  
憶予交君庚戌之年迄於甲寅月六十圓仲宣作客書劔  
三秋士衡老屋東西兩頭汗簡同炙紅螺對浮分花鬪句

隔燭燒愁及爾如貫單情得雙牙弦迭和洪鐘屢撞自予  
南歸楚水吳艘玦判璋分盈盈一江予作勞薪君高衡葦  
少微煌煌寥天之一何圖崇朝鵬鳥鳴室報書遠來驚聞  
輟瑟嗚呼痛哉君質如水進德如火以火爍水知其不可  
嬰疴幾時服藥幾裏津堠遙遙懔然雲墮嗚呼痛哉憶予  
喪親時客君士君爲經紀立我於戶憫予孤露謂予毋苦  
宜紹清芬勉旃力努及乎分張函問綿絡勸加餐飯飭止  
栢酌刺刺于言憂予體弱豈意長星先壓君脚嗚呼痛哉  
君有母在白髮垂垂下無遺孤寥寥總帷孰爲君嗣孰瞻  
君發予涕不止阿兄可知君之遺文予有半箱舟車出入  
或存或亡誰爲哀集闡其幽芳如椒斯馨從風以揚言笑

在耳酒痕在衣  
淮雲頰波仙耶是非實以誅華表之素旂  
用激頑懦清規世稀嗚呼痛哉



翰林苑待詔徐君妻吳安人誄 并序 彭兆蓀

歲在昭陽斗維建巳吳江徐待詔達源執訊寓書以其內  
子吳安人之喪來赴於余瓊範收華瑤光掩彩標擗之慕  
感均古今豈况同心駢穗失蘭臭於房敖緝雅剗風斷琴  
絲於伉儷此尤黃門永逝之淚霑滴晨檐希逸哀誄之詞  
風鏘楚挽者矣安人諱瓊仙字子佩一字珊珊前身娥月  
生具圓姿夙世璇星長工織句九梁郤飾惟裝玳瑁之書  
四葉開屏只綴珍珠之字迨乎筭總歸於吾友徐君鵲翼  
齊心蛩蠶儷影剔金釭而喝韻排鴻朗以分茶賭側體於  
雲藍曉黛顰展聯秋吟於霧幌夕蟾娟來四壁花深一樓  
香重勝趣旣協間作雅游當夫蘭芳逼人嵐氣入野輒復

携鏡具命煙舫磨薛石而畫斂痕刻槐眉以銘元跡草木  
掩藹如帶香煙衣裳飄搖若負星月是雖玉簫吹鳳瑤裝  
駐鶴不是過也徐君嘗宦京師半載而返王寬夢想之勞  
高柔愛玩之志雖有華袞不以易蘿薜已維時惠問川流  
勝儕麇集成陰接軫靡間弦晦安人魚藻以召之雜佩以  
贈之一枝松塵蔽障談元十樣蠻箋隔屏授簡陳局星晚  
奠爵露初墜異連波恒隨綦跡人如劉柳服到心形葢青  
鳥翡翠無以喻其婉變矣無何恒幹不居舜華忽謝彩鸞  
委世遙天之笙鶴如聞紫玉成煙中榻之妃豨孰和嗚呼  
哀哉徐君煩寃紆鬱涕下如縻檢故物於雕匳搜殘牋於  
畫篋乃得已未歲手書題拙集詩二首絹素欲裂烟墨猶

新曲飾蘭言兼憐桃泛琅璈曼罷偏留賞於孤桐瓊簡繙  
餘訝垂光於塵札半格獨詠一鐙自怡徐君蓋未之知也  
逮及今茲方始緘寄嗚呼哀哉倘使綠字不傳縹囊永闕  
尺波電謝清都路遙則豈知華鬢天上尚餘不櫛之鍾期  
朱鳥窻前乃有審音之涓子其爲僂悒更何言乎月苦玳  
砧旣悼然乎芝蕙風傳玉度敬撰德於旒旗其辭曰

結璘誕秀瑄朗降芬珠戴明月髻梳頽雲宛宛麗質託緒  
讓居光啓幼德如蘭斯薰裁衣織素弄藥爭花修詩賁道  
其儀孔嘉白家金鑿宋氏若華咳唾珠玉卷舒雲霞施衿  
東海待姆北堂威姑怡顏元胤承筐妾發高詠郎裁報章  
三春花柳一門宮商寫韻樓高行窩日麗葛歌分箋栗典



閒隸鶴蓋圍賓鴛漿泚齊脫環佐餐刻燭呈藝雕陵凡質  
折陽孤唱久拚補袍或用覆醬何圖中閨乃覲牙曠百畝  
赫蹏十讀怱悵銀管妍製烏闌細書閒評香南自賞花餘  
悄悄柔德沈沈綺疏緘滕三年玉佩瓊琚柘館春歸瑤田  
路絕返真絳河昇靈霓節瑀瑁殘言發諸扁鏃尺幅函馳  
千行淚掣嗚呼哀哉組帳空兮簫局寒落花寂兮青苔斑  
掩珠櫳兮罷吟雨泝天濤兮睇乘鸞何慧業之邁等嗟長  
年之獨難要塵網之滓濁非神躬之所安匣留遺馨巾見  
餘軸粉痕簡青字跡縹綠明明琅書眇眇法曲盍麗金繩  
裝之寶籙嗚呼哀哉彼娉嬪之彩伴兮猶痛乎珩佩之徂  
音况文簫之珍偶兮兼文字之緣深松扇閉兮白日道盡

絡絲兮長簾愁飈車逝兮大霄路簾影黑兮珊瑚鈞蘭馭  
風兮芬遠悵瑤情兮千秋嗚呼哀哉

國朝駢體正宗

卷十一

三

駢體正宗卷十一



國朝駢體卷十二

南城會燠賓谷輯

重修會稽大禹陵廟碑

胡敬

稽古六十四民之祀秩宗以無主而推恩七十二代之君  
祭法以有功而望秩是以龍髯攀墮橋山護劍鳥之陵鳳  
竹斑深梧野奏英皇之樂序星辰而郊譽臺野西連均刑  
賞以宗堯穀林東峙大陵享帝樂壇留啟筮之亭有異稱  
君俎豆徧象封之國而況鬢河著蹟厯八載以成功嗣子  
消爭寇百王而立極者乎會稽有大禹廟其來舊矣乃者  
厯歲既遠建議重修風雨連朝春秋何祀邑之搢紳率諸  
耆老申請大吏遵奉

詔條鳩材庀工斷撲塗墜于某年月日經始某月日落成  
體也或謂白衣砥礪故居指崑石之鄉丹殿陰森遺址列  
盟澤之岸過中條之廣野避暑留宮訪五嶽之名山封泥  
表埃石泉都遠耀華庶于巴江金柳城高建叢祠于夏邑  
湘潭磯上虹光騰鷲帝之金嶧冢巖前珠滴瀉扇池之水  
豐碑岌業蛇靈銜岫嶼之文斷碣摩挲蚪篆認崆峒之記  
倚梯崖險魏都之貞石留銘望國雲遙蒲郡之清臺置驛  
固不獨禁明脩龍丹忱輸東海之民殃免爲魚靈貺答南  
浮之洞已也不知捍災禦患澤無遠而不留崇德報功神  
所依而倍切溯自磐石探神符之秘烽息滔天釜山懷州  
鎮之功耄因留越慰劬勞于聖妣爰開修巳之宮配饗祀

以賢丞勿替少康之世逮及仍孫創霸猶嚴樵採于陵山  
支子分封永奠烝嘗于越會豈不以巡方不復魂魄長戀  
乎茲鄉穿壙猶存衣冠不同夫假葬哉獨是不矜見稱于  
虞舜無間遠嘆夫宣尼後之人溯澧水而念貽謀景梁山  
而懷舊甸推崇匪易贊美奚從所希秦望留巖蹕記祖龍  
之駐史遷好古穴傳司馬之探則謹就於越之遺勛歌詠  
聖神之丕績焉試觀斬高喬下導滯疏停梳三門而斲二  
渠纒扶風而沐滂雨濟巨浸則鼉梁跨遠踰翠岑而蛟馭  
騰空遂乃南修彭蠡之防北掘崑崙之地期愆癸甲少整  
冠納履之間輔藉庚辰得斬石疏波之助撫蠻夷于窮髮  
山造積冰追羲馭于扶桑淵臨沸水山樁泥橈徧續楠攢



樹之鄉形瘦神勞莫丹粟黃支之宇罔勿親程畚築界別  
瓜離赤埴青墟十二壤之條繇異種擊閭出填三千里之  
筐篚同風禹之平成大矣然而栽梨蔽畝標青玉于衡巖  
望柳回車慘元魚于潭渚裸入狼臙之國繪竟忘垂迷登  
壺項之峯泉還共掬民傳飲露荒渺難稽山到搢天微茫  
莫辨曷若三江厯厯南條留疏鑿之蹤九山峩峩東冶著  
隨刊之烈了溪流水含仙澤以浮藍燠峴荒城仰神功于  
頽雉石船猶在遠想乘躋度弱之奇畫角仍鳴如聞濁水  
傷枝之歎是則赤帝之巖鑿而懷襄之災始平蒼水之使  
來而山川之理乃得此會稽之所宜崇祀禹也爾乃蓋地  
披圖鈐天造厯以南至六十日爲正歲紀甲寅步東極二

萬里而遙算操豎亥感金符而制崇白乘木德而服尙青  
任賢使能公卿修五等之制貴爵尊齒學校宏二序之模  
定考績于三年修巡方以五載聲爲律而身爲度左應繩  
而右應規夫且五行開聽朔之官堂修二七九等定惟貞  
之賦歲厯十三夏罍春斤民力厲畋漁之禁史箴警誦臚  
言納耆艾之規元卷延垂受寶籙靈符于文祖白菅采純  
塵精稍吉玉于名山炭俎山巘映牟追而光燦雞彝龍勺  
施彫勒而輝生牲用黝而先薦心祭以闡而其祀戶禹之  
禮制備矣然而東南巡守獨傳大計之名中外共球共輯  
維揚之地探雙珪于碧岫日月光華哀四帙之黃圖河山  
流峙羣神用致祠上帝于北阿陽翟忘歸泊餘航于南鎮

用以調權衡而平斗斛見耆老而納詩書至今白壁騰光  
穿土啟千年之瑞青山望幸負辰留萬古之稱是則百六  
年化制之隆莫盛于茅山之會七千國聲教之訖最著于  
玉泉之朝此會稽之尤宜崇祀禹也若乃駢三聖制九招  
奏六英舞八佾洞庭張樂作大訓大化以颺功夏籥成章  
先大獲大武而致物由是憲道陳鼓復獄揮鞞設五器而  
銘以垂奏九原而功惟敘命扶登以拊石六府孔修詔大  
業以廣歌八風丕應階前浮磬遙分山獻之輝堂上孤桐  
旁接龍章之色大鹿巽而喬雲現元圭錫而康歌興禹之  
樂章明矣然而帝乃持衡竟退虞韶于賓位啟因嬪女遂  
傳天樂千人寰嬰一璧千熊山舞千儷冕擁三層之雲蓋



操翳操環未免神奇難從取信何似狐來自遠妾待其歸  
成室歌興發響龔山之麓侯人野望始基南土之音述洪  
水之愁民襄陵作操幸赤衣之貺我覆繡成吟似蠶追存  
剡水表棧鐘之制如皞樂奏防山聞截竹之吹是則聽彫  
尾之辭驗大夏之勤而不德觀被髮之舞信九歌之董而  
用威此會稽之尤宜崇祀禹也他若乎龜負文青犬授簡  
六甲陰陽之道八卦勝負之符黑書示兆乎臨洮綠字呈  
祥于濁水象垂括地綰以丹繪圖啟開天檢之元印爰乃  
岳瀆輯記山海編經臨流沉秘景之符衍範闡真靈之要  
地神現而天帝賚寶文之冊龍關鑿而河神獻金版之編  
牧德符傳杼山銘勒舉凡衡華空同之上霍瀆嵩岱之間

莫不龍畫旁分螺書匾刻禹之文章蔚矣然而白銀青玉  
是封石頽之中金簡紫文猶貯瓊樓之上元夷使者授圖  
于宛委山前青虛真人傳道于陽明洞側是以吳宮啟宇  
書隨赤雀以銜來越女縑絲繭托白魚而化出向使二五  
九跡之術徒受琅風一十二卷之經未探巖石東南有柱  
不傳黃帝之中經靈寶無書空遇清都之元女將見青泥  
欲記而古篆難求白馬空刑而名山莫攷符絕龍威之獻  
河空馬頰之疏說地無書冀州何載仲舒淹雅終難名異  
鳥于重帟子政宏通且莫辨枯骸于貳負是則虔齋巖嶽  
爲十三年受命之原倚嘯苗山開四百載同文之治此會  
稽之尤宜崇祀禹也至若通九術五勝而師徒興定弱守

強攻而城郭作臙辟宮辟劓辟墨辟律乃制爲三千條象  
刑官刑教刑賊刑罰無過乎二千饗詔孟涂以正訟建鼓  
朝端命天老而肅兵樹綏車右蒼梧泣罪寓忠厚于刑誅  
元戎誓師震威明于步伐因之乘駱馬以御戎事駕鈎車  
以整軍行戮相柳于崑墟澤谿三仞鎮支祈于渦水鐵鑠  
千尋鼎鑄雌雄金寫神姦之象階陳干羽壘降反背之苗  
囚鴻蒙而走鴟脾肉穿胸而墟有扈赤枝被石遠攻雲南  
之欒獨木浮船肆伐尼陳之梓雲中紅袂盡佩刀裹甲以  
來朝江上黃龍且掉尾弭鱗而聽命禹之刑威赫矣然而  
專車節大防風伸後至之誅焚甲仁施大越驗諸夷之附  
當其舟航甫捨玉帛方陳而遽攻曹魏以徇羣侯伐屈驚



以威逆命巖埋銅劍鵝膏含列宿之輝地築刑塘沙鬣闕  
巨人之跡夫豈若獄臺囚舜吳刀出啟罍步穢鬼狂章命  
神附會無憑浮夸難據哉是則奉辭罰罪有綬服奮武之  
明徵先祿後威亦禮家右文之過論此會稽之尤宜崇祀  
禹也爾其好緣惡駟先信賤文七表承風九埏復璞胼胝  
均勞于廝養儉勤秉教于甯真總細布以爲衣澗明水而  
薦廟龜貝銀玉五品從興茅茨土階三等勿越凜投饋而  
勤捉髮輕尺璧而憐寸陰顧絕遺簪廷任雀羅之設歎聞  
折額醪終帝女之投雖蔣席耕鞣器創縵緣之飾而雕牆  
峻宇訓還典則之垂大興柔利之臺爲居羣帝偶鑄麻山  
之幣祇給諸侯允宜令把元宮膺司祿司金之福猶且問

周下土切爲驕爲汰之憂禹之儉德昭矣然而玉色封蒲  
甘醢著仙經之品珠光造粉增華傳墨氏之言啟安邑之  
離宮丹庭紫殿醉鍾山之華宴玉柰金漿說惚違經言真  
罔聖豈若土纔掩壙千人圍封樹之壇窆尙留銘七尺聳  
嶄巖之石斂形骸于終古桐可爲棺開都會于當年門惟  
橫木伐山易竟改畝無煩是則隧道之不及泉淵實垂明  
訓無余之不修宮室乃紹前徽此會稽之又宜崇祀禹也  
至其尊墨如以作師引舉子而爲佐立十二嬪以輔內治  
得七大夫以贊宏猶奚仲則車正是司昭明則人時敬授  
學于西王獨而聖德懋鑒于東里槐而政令明舉大費于  
陰方之中避商均于陽城之下忘有過人之質築以臯陶

本無私啟之心讓于奇子瞻耕式耜通方外以求賢八水  
詢漁秉虛中而適野虞黃童律資爲禦侮之材橫革直成  
訂作同聲之侶夫且賜成光以參龍之氏封相士以牧馬  
之勤掌火焚林隕鼓擅百蟲之號分流闢華巨靈留雙蹠  
之蹤五丞備黃帝之官黑風會紀九土奏黎民之粒稷契  
宣猶禹之旁求切矣然而巫岫神遙空在雲華之謁天官  
書獲竟頰風后之谷惻吳越而決江流會借六子共益夔  
以求川脈同受五符歲以犧供償伯翳匡襄之績帆仍石  
峙仰聖姑翼輔之勳是則卿士之配明堂尙傳越絕昊蒼  
之賜神女獨在塗山此會稽之又宜崇祀禹也至若廣柔  
啟聖高密鍾靈駱明之世胄非遙女狄之徽音不爽參效



瑞而星貫昴月降精而珠墮懷遂乃越十四月而降生麻  
十二年而佐治鈴星首戴瞳韞采以河渟墨斗胸羅髣蜚  
文而玉立參瀾紹達聰之聖偏枯徵行遠之勞稻雨天來  
木禾地出乘船入月早名懸玉兔之旁夢日滙河終圖受  
堯壇之上執纛雷以度地沒爲紫庭真人入空巖而遇神  
呼作華胥聖子以至神鹿行水元龍御雲祝融降乎崇山  
駒駮出于方澤禹之符瑞顯矣然而石坳石紐地旣傳謠  
女志女嬃名還互出石傳開母化熊之說無徵坪號剝兒  
剖脅之言尤謬地身可駭荒唐御寇之詞龍家難尋幽渺  
青城之記以至通女台桑之野解身陽陴之河欲弭患而  
戕生竟合昏而非禮有崇何在神其跡于蕙苴之吞重華

未升示其文于璇璣之握此與夫黃能入水朱雉窺屏難以言詮同其語怪夫惟栖神築館鳥耘昭咸若之仁庶子儕民燕噤感非常之瑞覩參耕之畝麟想游庭酌菲飲之泉鳳疑棲樹是則玉簣書藏之地寶鼎湖龍去之鄉越棲甲楯之山正舜葬蒼梧之野此會稽之又宜崇祀禹也夫是以有宋開基置守陵之五戶前明定禮修告祭以三年丹雘重施新葺在紹熙之歲山龍作繪呈圖自洪武之朝我

國家治繼三王文敷四海

翠華親謁薦歆昭

列聖之虔

丹誥新頒膺錄展明禋之典

特遣皇華之使昭告明神  
恰逢輪奐之新重開廣廈  
當春令布星槎拂漢以遙  
臨不日功成虹棟排雲而  
上出縹砌列蒼官之仗表  
社仍松塗墉依世室之規  
夾窗有屢法遵積矩度陰  
陽向背以咸宜訓凜卑官  
絕玉碣金鋪之華飾圖九  
州于庶下大匠咨班模五  
嶽于楹間遺經披益展雲  
旗于枿拱敢諫幡懸樓金  
爵于觚稜伺風烏肖冕旒  
秀發紘縵垂亥旣之光階  
楯嶙峋奮揚效子來之職  
不是武梁之殿曲尺還操  
試摹鐘鼎之書琕戈重劫  
貢如任土垂橘柚以盈庭  
鳥尚隨陽飛雁鴻之滿野  
用以迎神祐體

皇忱刻桷丹楹輸三品惟金之利奉盛薦幣酬萬邦作乂



之勳仰復廟之巍巍陽開陰闔望佳城之鬱鬱人往風留  
明德長懷竊效巴峽無功之賦煩言何補竟同相斯沒字  
之碑銘曰

茫茫禹跡畫爲九州立極鼈足拯民魚頭不冒所訖含生  
之儔罔不鳧藻頌厥鵠猷緬昔中天沈潛未澹舜華掩重  
堯勳辭放緡淵莫填息土虛障玉牒天啟金精宵降往來  
平定嶽麓之庭八年于外四載是乘心剝形察仰高俯深  
植嶽以峙刷河而渟南踰北過西延東造如風之熏如雨  
之膏通脈百川回光二曜大夏歌成九天功告襲乎鼓之  
軒乎舞之光華復且卿雲爛施龍蟠于野龜遊于池迺伸  
德讓迺總帝師於帝陶真昇而天祿彼微者理彼危者欲

形期于緣德誠以率心傳旣授坤珍乃握五玉二帛來巡  
自東升禋泰岱輯瑞侯封震澤底定江漢朝宗爲綱爲紀  
成允成功巍巍四明迢迢五泄有阜惟鍾有水惟夕鏡湖  
帶前爐峯環側萬古存陵一杯表穴丹崖拔地蒼松蔽天  
玉笈山下龍瑞宮前銘搜稹勒碑剔魴鑄爰究爰度有鳥  
有挺奉璋峩峩新廟奕奕旌揚其綏豆羅其揭階敷筱蕩  
璣盛黍稷維揚之產厥包之錫禮崇祀典  
睿藻頻頒千秋萬古帶江礪山虛室生白飛閣流丹宏規  
大起密石重刊

積古齋鐘鼎彝器款識後敘

朱爲弼

慨自斗科姬泐竹帛羸燼蒼公赤篆南閣祭酒撫之素王  
青書臨淮太守傳之乃麀筆遺左史而歆移徒勞鴻都崇  
伏書而包竄又作龔其斟斲墳索黼藻羲軒難矣必欲洞  
書名鏡神旨祛奇詭追始初藉非欲山吐川陳彝得鼎厥  
道曷由我

朝龍興大文虎炳天臨朗鑑地出稊鐘冊府丕煥編珠蓬  
扉不禁藏璧亦有癖深原父智儕子高集吉金書詮祥器  
字顧茆檐未窺柏寢蠶勺安測烏瀾失采翡翠之翎遺拔  
犀象之角說難盡躡覽者弗慊矣維吾師雲臺先生經緯  
馮生鑄谿邃古



宸籙鸞筵辟塵鶴從釋天上雲雷之文辨階間球罇之刻  
洎乎握尺山左樹麾湖西清白心圭揭黃手繭種金薤於  
燕寢叢銅花於雕函爰命緘愚載哀鱗香見慚榮印問待  
鏞撞懷鉛則斗建周杓數弓則日干合筴紀商周以迄魏  
晉摹頡籀以臬斯邈劖劖垂蕝校勘遂施敢述薪傳用綴  
簡末夫分器名冊司尊設官經傳孔悝之文史記美陽之  
字齊犧以送女爲媵魯壺以貢王存名武王盥盤著滌淵  
之戒大禹讓鼎勒昧旦之詞故書羅蒐曩制灰威莫可詳  
已至於宣和殿圖尙功石刻肴核六籍俎豆三倉先民是  
程後民是語然撫拾榛雜肆攷豕訛造作孔躋善美非盡  
質之大雅曰猶有憾蓋聞古聖之道立器生禮踐實存誠

菜菽常餼必蕝三壽饋餽小敦欲至萬年飾鏤璆不厭其  
華川泉貝不病其厚將以壽名教礪綱常鴻聲明賁文物  
出治理而綿遠久也夫亨鷓神祇盥薦考妣執旂立矢論  
譔前勞是爲大孝呼史宣綸立廷受冊鑾瑁鞞戟茂歷紀  
庸是爲純忠厭祭禮殤父渠作萃勳績鏤屬正長錫彝是  
爲慈惠列侯朝聘贈金鑄鐘僚友饗殮彝金銘篚是爲豈  
弟叔夜用簠同符孔共唯叔居晦允契商警是爲恭儉此  
皆經世之鴻寶生民之令儀雖祖龍魂殘赤符凌替典則  
失徵范模猶在自後世祖尙虛無輕蔑文字而淪沒盡矣  
且夫琥珀孕于荒麓遇芥則投珊瑚沈于環瀛舉網則獲  
物聚所好亶其然乎茲所輯者約斯彝五百餘器綜篆籀

一萬餘言玉府崑山珠海合浦鮫綃五色鳳綿千裏洵極  
金滕石屋之觀寧止滂喜凡將之作夫推彌曠者道也闡  
彌精者義也舉而罔缺者典也久而始備者時也雷雨甲  
中遠協羲文壺戈蛟蚪上承皇史宗周鐘之警要服何如  
江漢常武之篇考父鼎之歆文丁可徵校頌歸祀之說寶  
敦矢夙夜識周太僕之虔尊鼎祝萬壽知齊乙公之侈頌  
之佩出反入卽晉重三觀之儀名之用田受秭卽呂命百  
綏之罰他若周王徙居楚麓楚惠遷自西陽可拾春秋之  
遺其王墓稱陶陵漢宮名逸蓮勺可詳班馬之畧謂非觀  
古之鹵牖進學之堦墀與然而俗情柴墨浮說雌黃其蔽  
不一舉枚可數或膠執偏端梗守前論宗祧北海求鳳皇



之尊應答竟陵善服匿之對一也執贖擬岑呼鼠尋璞父  
丁祖乙雜以比干之盤車攻馬同間以滕公之石二也又  
有引葛攀蘿削尋就墨甲附上甲庚測盤庚詎伯爲孝友  
之兄遽仲爲君子之弟奇觚妄會疋畢所訶三也昔在嘯  
堂大臨諸賢傳譌難免今稽東觀容齋之論定評或虛彼  
謚守藏述古之心違重器不訾之例又無論已是編之作  
準六書部分挾小學奧微辦亞亞之殊詳割句之借繹耐  
彫之同論逞狂之合釋攸勒爲筆革明夜珠爲射瑀訓同  
黃爲彤衡通室夢爲室昧凡此之類咸據有聞不知葢闕  
若夫子商簡古姬周富繁時則良之南楚雄奇東魯匪厚  
俗則囿之文詞具存鑒察斯別間有勒欵叶字可絃而歌

堊疆雙聲攸休疊韻綏賓倍律大琴和樂講音均按間呂  
者舍是蔑從也又觀夫鉶餅異制瓊盤別名簠廡爲胡連  
古今文之判敦匱盛黍稷方圓說皆通營簠則方語各分  
戈戟則散文互用金豆與瓦竹俱船兕觥非骨角所成是  
又辨器者所當考鏡也且如姬公丁亥之鼎言歲紀者祇  
統微散氏乙卯之盤言與圖者訂鳩辨父丁角之東門無  
專鼎之圖室言宮室者參階有登寺莫陔國名牒焉遣泉  
師鬲氏族譜焉子甲爲嘉嫺之子陳逆爲狙子之孫世系  
緒焉司工爲司空之屬司土卽土均之職官制羅焉邢叔  
奩父魯鄭臣名熊章攸人楚都君諱名字炤焉符節並載  
量斤咸垂漢尺與晉尺齊衡秦權與莽權均錄金師比有

度斗檢封有銘尤六籍之星源百家之鑪橐也小子愚實  
近古六蔽莫開吾師諮必於周五善斯集積古疏入  
先皇曰俞師古政成維

帝時眷宜也蓋康虞綰綽者福之府通衆眉壽者德之符  
懿夫享覲式儀華陔隆養鑄詞刻漏勒篆夾鐘道著器成  
淵乎茂矣然猶不嗇其有不寶其私隄麋之鋤腴置譙山  
上陽之罇嘉薦祔室是以籩豆有踐金石同和也是編也  
成直追孔甲盤孟之書奚僅復齋鐘鼎之志而已哉



查伯葵詩序

郭 麐

文章之事有二難焉約勅自好不越繩微而以邊幅見病  
卓犖偏人意主氣勢乃有奇佻詭常表裏已或絕殊彼我  
各爲一是求其通材世罕逢邁漢魏尙矣六朝以還代有  
曠逸今之作者流別唐宋子長逸才亦曰法後柳州傑士  
不盡榮古要以飈流遠祖體勢近宗苟有特達必非形合  
建安自具神鋒豈曰規模正始人心不同天巧時變卽其  
偏宕多奇已復領衷一輩查君伯葵異稟絕人媚學不倦  
動厄於世獨放於天窮居幽屏提鵬擊鷺孤往遠戍模山  
范水放言而穿心出脅獨念則出鬼入神體制無詭於來  
今意旨彌軫乎在昔目中所見文外獨絕夫遇合有命奇

偶不齊影纓承明不必東馬之彥冠冕當世豈盡燕許之  
筆蕉萃婉篤中多姬姜莫得而索唏矣又嘗見橫厲世宙  
馳聲海外百川仰流萬羽承翼泪夫芬艷攸寂聲華徂謝  
褰裳先遠擗裾卽去榮落轉燭頌謗隨之甚者覆手相軋  
集矢不顧謚爲至愚固無小慚孝章要有天下大名元龍  
自非餘子可及尋迹按響當不其然伯葵旣無藉於獎飾  
亦不訾夫遷流自信其學獨斷於中當日而衆不爲奪過  
時而人皆自失霜降木落水流花開傳之其人豈不在我  
僕幼而無似思之至深阨窮之遇相同研幾之道未極然  
於追往溯來探近索遠志所不逮意過其通竊謂騷雅之  
變化遠近之離合英咀華實富有卓然自見者近出所著

巧言爲証不暇辭讓爰引其端旣謝一言之知亦任百爾  
之誚觀縷未畢主臣而已



開方補記後序

顧廣圻

右開方補記陽城張古餘先生之所撰也蓋聞開方元始  
載於少廣其在句股用以爲法嗣是相承踵事推衍稍變  
能精緝古有焉逮於季宋之世入諸天元之術爰因平立  
以增諸乘乃泊正負而兼帶從誠非其法有異良由所御  
不同作述之旨如是焉耳入明以後厥術浸微疇人子弟  
罕洞前故根柢云昧枝葉競興若溪分測圓之類宣城拾  
西鏡之遺轉轉遷移重重隔礙以致沿流愈遠趨路彌歧  
臨初商而回次值幾數而眩眩持小學之一端等天高而  
難上其可閔也不已甚乎先生文圃學林罔蓄疑義六書  
九數尤耐覃思初治海鏡默契洞淵翻法在記潛啟會心

以爲錯綜之致畫一之規猥入荅中煩而不究遺諸言外  
蘊而易宜損益斟酌周詳要練惜竟遭佚末從證明續勤  
網羅取雋道古商實從隅別名定位夙昔鴻蒙幾將鑿破  
猶以易題下筭未能應機無滯仍累年月且恒諮訪數四  
擘尋委曲曉也指蹤魯郡合轍樂城於是發凡舉例創造  
各條經之緯之茂矣美矣其於先超後折異減同加視上  
下而相生循次第以置變翻積益實之理適盡命分之數  
皆以墨守自古起廢方今至於議開卽決其可否審得懸  
識其小大極反覆於商負示易簡於取較則又闕未傳之  
妙標獨悟之宗者也體製宏深苞孕糅雜慮夫學者或鮮  
遽憐遂乃逐式設問每步加圖有奧必搜靡變弗備詳哉

言之無隱乎爾更於最後特探原本圓城尖田旁涉弧矢  
揆以所施申其攸當譬彼詁字依文匪異義之可奪協句  
準韻豈他音所能夢著茲確論允爲大通屬藁已未勒成  
乙丑區域九卷蒼萃一編隻語莫排千秋其信繼往開來  
溫故知新近禩九九一家而已從此游藝之士弄竹之倫  
藏於箱裏置向帳中不啻司南倚衡秘鑰繫肘者矣是故  
秦書具在拓過半之思李記雖亡釋俄空之憾敢贊盛業  
附誌知者



春日游白雲山序

吳慈鶴

白雲山者羊城之望也青嶂千匝丹崖十里錫泉曩卓紺殿新開坡陀鳳剎浮邱可以相望清淨鹿園安期之所曾駐爰以暇日命茲春侶觀察以吳中耆舊屏阜蓋而來游徵士以林下風期跨青筇而莅止至如僕者夙世道流等方壺之片雲本遼城之一鷁是非雙遣悠然湖海之間得失兩忘不在筌蹄之下以烟霞爲痼疾泉石爲膏肓消水佳人間尋綠髮梁園公子不願朱輪茲之游也適吾志矣于時上巳初過穀雨將及桐乍葉而還花柳初穉而卽絮野色萬變郊黃一碧霽光歛淑回峯現彩翠之林澹日浮曛密塢漲蘅蘭之烝中天可接初地俄登九折銅梁千盤

石磴春虹飲澗遭山神之鞭丹鳥銜旒禮燈王之座珠幢  
下綴少女先驚貝闕旁躋天人忽降馬鳴龍樹吐寶月于  
香林無着天親咲紅蓮于紺鉢至于孤岑直上幽徑數歧  
處處藤交行行葉礙風花滿谷趁紫蝶以狂飛雲乳半巖  
雜丹泉而迸落星駢一公菖蒲千載金庭不閉水簾兩重  
石浮菡萏之英山表靈芝之狀于是拂衣入座披襟當風  
席藉艸而不妨裾牽枝而屢絙綠窈鸚鵡卽王烈之香膏  
縹甕珍珠是嚴遵之芳乳雲疏自敞朱鳥無勞翠障能遮  
青牛不設極目千里天分牛女之墟直視三山浪涌金銀  
之島浩浩乎神交于赤松飄飄乎步景于盧敖桂樹發歌  
手招逸客元雲動操志在高山旣而若木全低纖阿半上

山氣青紫雲容縹碧命返轡登歸途山猿送客應瞞鐘而  
一啼烟艸美霏帶斜暉而不定夫升高能賦僕無望楚之  
才述志成篇容讓當仁之筆粗游翰海竟挺詞峯銀房秀  
句驚花首之仙人紫閣新詞問丹邱之弟子



越臺倡和詩序

吳慈鶴

昔柳州南邁詩裁青箬魏收北來句傳黃鳥况洛下耆英  
逍遙白公之杖永嘉太守流連康樂之屐具區欲雪遂訪  
戴而拏舟江楓初落竟看梅而度嶺羊城烟月之藪珠海  
風花之國暫紆五馬載浮孤棹行則錦囊游還阜葢紅簾  
續句補蠻童之飲白髮多情踐山靈之諾尙矣若夫峯歸  
越秀春深白雲花萬樹而齊芳艸百種而一碧鮑姑荒竈  
靈芝獨莖安期遺澗萑蒲九節命筍與而度徇拭蘚壁而  
留題琅然步虛之吟不滅雲璈之奏至千尉佗一去寶劍  
不歸劉龔孤墳玉魚先化祖燈斷續風摧紺樹之林霸業  
銷沉鳥拜黃金之塔朝漢之臺百尺鎮海之樓五層弔古

者于以獻歛載筆者因之惻愴莫不艷其麗藻摘此形豪  
少陵之徘徊錦里武足嗣焉坡老之嘯游鳳翔美堪媲矣  
彼越溪蘭漿非無莫愁錦臺春侶居然桃葉香魂弔月素  
馨不殊于玉鉤仙女啼烟錦石相望于白鶴或事涉荒誕  
或情乖麗則屏而不錄黜而不賦所以劉郎遠客未聞竹  
枝之歌元九賦詩不爲采春之曲悉歸風雅益重琳瑯鶴  
猥以葭葦效茲維繫珊瑚鏤案披羣玉之函鸚鵡奇杯勸  
長年之酒登楚庭之故壤瞰浮邱之別峯白鹿從游屢招  
隱士赤虬同跨卽是仙人慚東郭之吹竽澀雷門而布鼓  
絳宮瑤室竊賡下里之吟金庭銀房願示歸來之賦

與彭甘亭書

吳慈鶴

甘亭足下明月照膽春風吹懷二人同心千里如而去秋  
之仲接展芳訊輒欲裁荅忽覩家難家君旣南冠北行賤  
子亦辭齊入薊溫清請室魄再生死每至朔宇奏厲芳糝  
貢衰鳥獸多不平之鳴風雲有可憐之色周勃至此方知  
獄吏之尊緹縈訟父思伏金商之下人生已矣此情何堪  
及邀覆盆之炤復侍荷戈之行冬日烈烈飄風發發東門  
帳飲龍游之馬不多南紀星郵雞栖之車大去從此坐臥  
蒿黎鋪吸塵土蒼狼白狐跳盪左右驚砂走蓬委藉耳目  
空倉窮鳥求食而見羅鞅羣狐獸遭獵而登俎昔之菴藨  
挈鄂馳芳鶩藻今且啜泣霜露淒其雨雪則有高岡貞松



孤青表其色性危霄鷲隼獨運厲其精神撫時感序輒起  
于邑二旬之久始達淮上料理檣軸浙江而行風顛楚尾  
浪惡吳頭鼉鼉跋浪將腥大食之刀蛟龍繞船似劫澹臺  
之寶素旄綵繚而電掣銀山啊喝而鼓駭此懦夫之所雀  
息常人之所色變而怠氣自若杯酒無恙自謂豪健不減  
祖生矣及來南中遂事戎幕烏禽白葉苦竹秋香天未曉  
而笳吟營初春而柳細將軍樹下竟容長揖之人都尉軍  
中遂有悲歌之客若夫橫簫直笛能發揮猛厲長戈大劍  
能馳驟風雨金堤試馬玉帳傳杯青驄而去驚爲霹靂之  
聲白衣而來坐于橐鞬之右二肆之鐘旣陳一石之飲不  
醉此閩外之行樂儒者之奇遇也至于區脫莫警刁斗夜

鳴月纖纖而兩頭風蕭蕭而四起東不見滄海北不見燕  
趙始信卷旄實引愁之草美酒無銷憂之用長安之遠遠  
于日邊刀鏃之思思在今夕矣能不膺結神悴踟躕恟  
怳哉昨還惠陽復荷手教循繹數四彌感繼繼惟我與子跡  
雖鷓鴣心則却駢離多會少我勞如何秋風戒程將赴京  
國取道吳下冀接音采鳴榔采香之浦載酒舞鶴之市與  
足下痛飲三日賦詩百篇曜靈匿景繼以華鐙冶鬢命歌  
酌之金盞豈不快哉豈不快哉知足下惓惓于僕用爾縷  
近狀爲報新詩不多並附采覽江南梅熟風雨錯迕惟匡  
居善保不宣

與會都轉書

吳慈鶴

賓谷先生都轉二丈閣下蓋聞桐魚拊石相隔千里豐鯨  
應霜所託異質所以氣誼之感易取喻於雲龍切磋之義  
雅興嘆乎皋鶴良以同類乃克相孚未有引蕝鮑於芝蘭  
升疋雛於鼎俎般爾運斤于曲木娟嬛施餌于鯁鯁豈知  
者之疏乎蓋愚者之幸矣閣下牛斗紫氣豫章朱門弱冠  
鷺序三十蟬冕蓋干將莫邪天亦試其鋒鏑希有歸昌世  
皆偉其毛羽自領鹽筴干今十年以劉晏之精心運韓滉  
之大度持籌握理江淮晏如加以天才瓌特著作英妙馳  
聲月岫則衆善畢舉飛藻雲肆則五色相鮮慨自黃初以  
來迄乎勝國之末騁駟競奮羽翼代嬗各負洪纖之鳴孰







洩伏想禋躬應節多豫謹撰五言古詩五百字以志尊俎  
之盛又錄舊文數通並附采覽嫫母衣錦終莫逃乎明鏡  
鉛刀躍冶曾何當干風胡無任悚仄瞻企之至



蘅香館詞序

汪全德

夫楚門茂苑芳蒔生而蕙心橫塘查下春江流而綺注臨湖別壘彎碕故宮人藏黛華家遺屑玉麗情以巧傾南國雅步亦妙擅東都鶴宮則豔曲葳蕤梅里則新聲絲會雖無當於防露亦何讓於結風風人既不廢綠情房中曾無嫌合雅是以扶風椽蠶之賦唐山桂華之詞選玉匣於琅邪集茗香於樂苑連彩鍼以答詠奉明鏡而報書亦有恨拍邊風悲詒山雪莫不移絃蜀國應教湘宮貯以香奩書之寶笈已况乎舊京王謝名都魏虞蘭綺稱賜書之家璇淵開列柘之館樓臨大道臺接金門秦中以翡翠爲䟽鄴下或珊瑚作檠綺錢窠珠琲闌干中有麗人含愁遺世

蕙芳總髻之歲弄玉及笄之年留夷坐銷輕容遲御罷戲  
鈎弋慵窺影蛾銅蠡春永綵索縞而可攀朱鳥秋深紅霞  
碎而愁唾移衾豆蔻悵涼露兮未隨障袖櫻桃怨東風兮  
不下時或聯裾東第結帶鹵陵傅璣其簪葩莖並駕爭投  
壺於玉女笑捧琴於石姬釵亞連心花懸竝縷翩翹星落  
漣被溪香亦豔奪於穿珠復賞窮於墜鳥已而鬧蛾妝妬  
戲鳴情闌結珮空歸停車晚下步風臺而宛轉經露榭而  
虛寒桐華漸深蘼蕪坐老三月三日之桃葉千樹萬樹之  
楊花皆可以悽折容華銷沉情思者也干是采清綠綺傳  
膩紅絲閒開水碧之奩妙研雲藍之紙燒香對檢然樺坐  
書三家豔選希合製於瓊臺十斛平量媿精心於玉尺按

之舊譜被以新聲嚼蕊含商垂華凝露覩回雪之髣髴聽  
流塵於步虛春風未熟暗澀鷺簪驚花欲飛嬌迎燕蹴參  
差洞吹之節玻璃敲碎之聲豈獨悲亞裁紉感均漱玉加  
之華雲縟映飛月裴裒繅彩隱曜乎石華靡光玓瓌於珠  
子蘭茗延露裊千香而側生芍藥採雲經五和而成製嬋  
媛若此雅麗兼之其如洞房窈窕鸞戒未成瑤臺偃蹇鳩  
媒潛託悵蕙綢於公子誤荃壁於王孫清湘泣孤憤之花  
合浦斷含情之樹此無異青禽東下銜永恨而呼名黃鶴  
鹵飛痛吾家之遠嫁者也緣爲慧勝命坐才窮信石闕之  
難銷詎臯蘇而爲用於是官商按怨么拍傳情古稱激楚  
之章今以傷心爲曲將無韓娥悲響卽已去而如聞齊女



長吟及宅生而不變擁愁深惜感遇私憐九誦尙取怨誹  
萬年何疑累德步結衿於箴史感生香之序言非無瑣蓮  
東宮謬托選蠶南部焉爾

國朝駢體正宗卷十二